



■ HEBAT...Andre Mewis dari Jerman menjatuhkan Simon dari Austria sewaktu Kejuaraan Sedunia di Kuala Lumpur dua tahun lalu.

TERBUKA MALAYSIA

# Mewis mahu langsai hutang



Oleh RAHIME YUSOFF - 1 DEC 1990

NAIB Juara silat dunia '87, Andre Mewis, kembali menyertai Kejuaraan Terbuka Malaysia di Stadium Negara bermula esok bagi melunas kekecewaan yang dialami di Kuala Lumpur dua tahun lalu.

"Saya lebih bersedia kali ini bagi memastikan juara. Lagi pun, saya sudah mengkaji keupayaan pesilat dari Indonesia dan Malaysia selama ini agar tidak pulang kehampaan lagi," kata pesilat dari Jerman itu.

Mewis, 19, menjadi wakil tunggal Jerman untuk beraksi pada Terbuka Malaysia kali ini dan tidak mahu menghampakan harapan Persatuan Silat Jerman.

S. Harian (M)

## Perguruan

"Saya kecewa tidak dapat beraksi pada Kejuaraan Sedunia di Belanda, Oktober lalu kerana Jerman menarik diri atas sebab kewangan.

"Waktu itu saya membuat persediaan bagi meraih gelaran juara di Belanda. Tetapi, kehampaan itu pulih apabila diberitahu saya terpilih sekali lagi ke Malaysia.

"Saya mahu kejayaan menyebelahi saya kali ini. Setahu saya, cuma pesilat Indonesia dan

Malaysia yang berupaya menghalangi hasrat saya untuk meraih gelaran juara," katanya.

Mewis daripada perguruan Panca Indra Suci yang dipimpin oleh Arief Soliano dari Indonesia adalah antara pesilat terbaik Jerman dikalangan 600 pesilat dari 15 kelab silat di negara itu.

"Dua tahun lalu saya bertanding bagi Kelas D, tetapi kali ini bagi Kelas G. Mungkin saya akan berdepan dengan juara dunia '87, Wan Aminuddin Baki dari negara ini," katanya, semalam.

Mewis mula mempelajari silat sejak empat tahun lalu selepas mendapati unsur-unsur yang terselit dalam seni mempertahankan diri itu mengajarnya menjadi lebih berdisiplin dan menghormati orang lain.

Selepas kejuaraan ini, katanya: "Saya akan mendalami silat sama ada di Malaysia atau di Indonesia dengan hasrat dapat mengembangkan lagi silat di Jerman.

"Jika ada perguruan yang sudi menerima dan membiayai kehidupan saya, saya akan mendalami silat di sini. Ini kerana saya tidak mempunyai kewangan yang cukup, tetapi berbekalkan semangat bagi mendalami silat," kata anak muda dari Berlin itu.